

Di Leta weh di Apasl Paul Rait tu TITUS

Weh dis buk deh taak bout

Titus dah wehn fahn di kontry a Greece. Ihn dah neva wan Jew bot ihn wehn kom fi chros iina Jesus Christ. Ihn work lang wid di Apasl Paul ahn ihn dah wehn wan a Paul helpa pahn wan a ihn mishonery trip dem. Ahn pahn wan a demde trip Paul wehn lef Titus dah di ailant a Crete fi pik out som elda fi luk afta di work, fi mek shuur seh di work go aan gud.

Dis leta taak bout three impuotant ting: Fos, Paul remain Titus bout di kain a karakta di elda dem fi gat, speshaly how plenty a di pipl dah Crete wehn gat bad karakta. Neks, Paul advaiz Titus how fi tiich di difrent grupp dem iina di chorch: di uolda man dem, di yonga man dem, di uolda uman dem, di yonga uman dem, ahn di sliev dem. Ahn laas, Paul tel Titus how aala di biliiva —no mata man or uman, yong or uol— bihiev demself.

How dis leta set op

Introdokshan *1.1-14*

Di chorch liida dem *1.5-6*

Di dyuty dem fi di difrent grupp iina di chorch *2.1-15*

Inkorijment ahn waanin *3.1-11*

Paul laas wod dem iina dis leta *3.12-15*

Di Apasl Paul rait wan leta tu Titus, ihn son iina di fiet

1 ¹Dis leta dah fahn mii, Paul, weh dah wan a God sorvant ahn wan apasl a Jesus Christ. God sen mi fi go, go inkorij ihn pipl dem weh ihn wehn pik, fi dehn gat beta fiet ahn fi dehn andastan how dehn fi liv iina wan wie weh gwain pliiz God. ²Den, dehn kyan luk ahed tu di laif weh gwain laas fareva ahn eva. Dah God ihnsel —weh no tel non lai— huu don pramis fi gi wi dah laif fahn bifuor di worl wehn mek! ³Ahn den

wen di rait taim kom, fi wi Sievya God gi mi dis Gud Nyuuz ahn komaan mi fi go, go priich'ih tu evrybody.

⁴So, Ai deh rait dis leta tu yuu, Titus, weh dah mi chruu son iina di fiet weh wi shier tugada. Ahn Ah prie seh God di Faada ahn Christ Jesus, wi Sievya, gi'yo plenty gries ahn piis iina yo haat!

Titus work pahn di ailant a Crete

⁵Titus, memba seh Ah lef yu pahn di ailant a Crete fi yu mek rait aal di tingz weh wi neva get fi fiks, ahn fi yu pik som chorch elda iina evry toun. Dis dah how Ah wehn tel yo fi pik dem: ⁶Di chorch elda dem fi liv so nonbady no gwain gat non riizn fi fain faalt wid dem. Dehn fi gat jos wan waif. Ahn dehn pikniny fi chros iina Christ tu, ahn dem fi liv so di pipl dem no gwain seh dehn wail ahn yu kyaahn tel dem wat fi du!

⁷Aal di chorch liida dehn gwain deh inchaaj a God work, so dehn fi liv so nonbady no gat non riizn fi fain faalt wid eny a dem niida. Dehn no fi proud ahn dehn no fi get beks iizy. Dehn no fi bii wan jronkin man, niida fi laik fait. Ahn dehn no fi groj weh ada pipl gat ahn waahn get wan lata tingz fi demself. ⁸Bot, dem fi uopm dehn hous tu strienja ahn mek dem fiil gud. Ahn dehn fi lov di tingz dem weh rait. Dehn fi bii sensabl ahn fier; dehn laif niid fi bii kliin tu, ahn dehn niid fi kanchruol demself.

⁹Dehn fi huol aan tu di soun tiichin dem weh no gwain chienj nontaim —dah siem tiichin weh wi wehn tiich unu. Ahn dehn fi fala dat tiichin wid aal dehn haat! If dehn du dat, dehn gwain kyan help di pipl dem laan di chruut fi inkorij dem. Ahn fi demde pipl weh deh taak gens ih, dehn elda dem gwain kyan help dem get fi nuo dehn mistiek!

¹⁰Ahn, Titus, yu gat plenty pipl mongs unu —speshaly demde pipl weh insis seh unu hafy get sorkomsaiz— weh no waahn pie no main ataal tu di chruu tiichin dem. Dehn jos deh fuul'op di ada biliiva dem wid dehn fuulishnis weh dehn deh tiich. ¹¹Sombady hafy stap dem man! Bikaaz aal dehn deh du dah fuul'op wan paila famaly, deh tiich demde kain a tingz weh dah no chruut. Main, aal dehn waahn, dah yo mony! ¹²Dah no wan a dem Cretian pipl —iivn dehn uon prafit— weh seh: “Pipl fahn di Ailant a Crete neva taak di chruut. Dehn dah jos laik som bad animal, ahn dah demya kain a pipl weh liezy ahn iit tuu moch!” ¹³Ahn weh ihn wehn seh, dah chruut! So den, yuu fi taak haad tu demya kain a pipl so dehn kyan ripent ahn dehn fiet wi get beta. ¹⁴Yu fi shuo dem wai dehn rang, so dehn no pie non main no muo tu dehn stuory weh di Jew dem mek'op; niida tu di komaanment dem weh kom fahn demde kain a pipl weh ton weh fahn di chruu tiichin dem.

¹⁵Memba seh: fi demde pipl weh dehn haat kliin, dehn si evryting az kliin; bot fi di pipl dem weh dehn haat no kliin, dehn si evryting doty. Dehn main korop ahn dehn kanshans neva iivn nuo dehn wende du

plenty bad tingz. ¹⁶Dehn seh dehn nuo God, bot aal di tingz weh dehn deh du, shuo seh dehn no nuo im ataal. Dehn wikid, ahn dehn no pie non main tu weh God tel dem fi du. So, dehn no fit fi du notn gud ataal!

Weh Titus fi tiich di difrent grup dem iina di chorch

2 ¹Bot yuu, Titus, yu fi tiich ongl dehn soun tiichin dem weh no gwain chienj nontaim! ²So den, tel di uolda man dem seh dehn fi kanchruol dehnsel ahn dehn fi bii rispektabl tu. Dehn fi bii sensabl ahn dehn fiet fi strang, ahn dehn fi shuo lov ahn pieshens tu. ³Iina di siem wie, yu fi tiich di uolda uman dem fi liv laik wan uman weh waahn du evryting weh God waahn im fi du. So, dehn no fi gasip bout ada pipl, ahn dehn no fi jrink tuu moch wain. Insida dat, dehn fi tiich weh gud ahn prapa. ⁴Ahn dehn fi trien'op di yonga uman tu, how dem fi lov ahn triit dehn hozban ahn dehn pikniny dem. ⁵Dehn fi bii waiz, ahn dehn haat kliin. Dehn fi laan how fi bii gud hous-waif ahn fi put dehn hozban fos, so nonbady kyaahn taak bad bout God tiichin.

⁶Iina di siem wie, yu fi tel di yonga man dem seh dehn fi kanchruol dehnsel iina evryting. ⁷Ahn yuu tu, Titus, yu fi bii wan gud egzempl iina evryting weh yu du, so evrybady kyan fala yo egzempl. Ahn, wen yu deh tiich, yu fi shuo seh yu miin weh yu seh ahn yu siiryos fi chruut. ⁸So, yu fi tiich di chruut aal di taim, so nonbady kyaahn kritisai yu. Den, demde pipl weh deh gens wi, gwain fiil shiem ahn no taak bad bout wi no muo.

⁹⁻¹⁰Ahn yu fi tel di sliev dem seh dehn fi obie dehn maasta ahn du dehn bes fi pliiz dem. Dehn no fi gi dem bak-ansa, nar tiif dem niida. Insida dat, dehn fi bii aanes so dehn maasta kyan chros dem.

So, if di liida dem tiich iina datde wie, dehn gwain jraa plenty pipl tu God wi Sievya. ¹¹Bikaaz now a diez God don shuo ihn gries tu aal di pipl dem iina disya worl so dehn kyan get siev! ¹²Dat gries tiich wi seh: wi fi stap deh liv laik if non God no deh, ahn wi fi gi'op di plezha dem fahn di worl weh sinful. Ahn, wii fi liv wi laif deh kanchruol wisel self —wan laif weh diisent ahn aanes —wan laif weh gwain pliiz God! ¹³Wi fi liv laik dat, wail wi wiet fi dat Blesed Die weh wi deh huop fah, wen wi gwain si di gluory a wi griet God ahn Sievya, Jesus Christ. ¹⁴Dah him weh gi ihnsel fi wii, so ihn kyan reskyu wi fahn evryting weh wikid, ahn ihn mek wi ihn sheshal pipl wid pyuor haat weh riily waahn du gud!

¹⁵So den, Titus, yu fi tiich demya tingz tu di biliiva dem. Ahn wid aal yo atarity yu fi inkorij dem fi du dem. Bot yu fi taak haad tu dem weh no deh du dem, ahn no mek nonbady disrispek yu niida.

How wan biliiva fi stand

3 ¹Titus, yu fi rimain di biliiva dem weh deh dah di ailant a Crete, seh dehn fi kiip demsel aanda aala di pipl dem weh iina atarity iina

di govament. Dehn fi obie dem, ahn dehn fi bii reddy fi du eny work weh gud. ²Ahn tel dem no fi taak bad bout nonbady, bot dehn fi bii piisabl pipl, weh frenly ahn weh triit evrybady iina wan ombl wie. ³Bikaaz wii yuuztu bii fuulish tu. Wi neva yuuztu obie God, ahn wi neva pie im non main. Wi dah wehn sliev tu evryting weh wi gat di fiilin fi du ahn weh mek wi fiil gud. Wi liv wi laif deh huol malis gens pipl, ahn deh groj weh dehn wehn gat. So, di pipl dem wehn hiet wi, ahn wii wehn hiet dem bak! ⁴Bot den, God, wi Sievya, shuo wi fi him kainis ahn ihn lov, ⁵ahn ihn siev wii —no bikaaz a di gud tingz weh wi wehn du, bot bikaaz ah fi him morsy. Ihn wash weh wi sin dem, ahn den ihn gi wi wan nyuu laif chruu fi him Holy Spirit! ⁶Ahn God neva huol bak notn, wen ihn puor out fi him Holy Spirit pahn wi chruu Jesus Christ, wi Sievya. ⁷So, sieka ihn gries, wi get fi deh rait wid God, ahn wi gat di laif weh no gwain don nontaim ataal! ⁸Ahn demya tingz weh Ah deh tel yu dah chruut!

So, Titus, yu fi ripiit dehn tingz aal di taim, so di biliiva dem weh gat dehn fiet iina God, fala demya tiichin ahn du plenty gud tingz aal di taim! ⁹Bot yu no fi get miks'op iina fuulish taak ahn aagyoment weh no gat non sens ataal. Wen di pipl dem deh aagyo naansens bout dehn lang lis a niem bout wi griet, griet, griet granfaada dem; or wen dehn deh kwaaril ahn fait bout demde kain a tingz weh di Jewish Laa seh wi shuda du, yu no fi gat notn fi du wid dat! Bikaaz aal dah kain a aagyoment no wot notn ataal, ahn ih no help nonbady niida. ¹⁰So, kansaanin demde kain a pipl weh laik mek trobl ahn kaaz divizhan, waan dem at liis wan or two taim; ahn afta dat, no gat notn muo fi du wid dem. ¹¹Yu nuo seh pipl laik demde, dehn main don ton korop ahn dehn uon sin dem shuo how rang dehn rang!

Paul laas wod dem

¹²Now, Ah deh plan fi sen Artemas or Tychicus tu yo. Az suun az ihn get deh, yu fi trai fi lef out siem taim ahn miit mi dah Nicopolis, bikaaz Ah wehn disaid seh Ah gwain spen di winta deh. ¹³Wen dah taim kom fi Zenas —di laiya— ahn Apollos fi go, Ah waahn unu help dem az moch az unu kyan help dem, ahn mek shuor seh dehn gat evryting weh dehn gwain niid. ¹⁴Di biliiva dem dah Crete hafy laan how fi yuuz dehn taim fi du plenty gud tingz tu, so dehn kyan help ada pipl get weh dehn niid. Iina dah wie deh, demya pipl gwain liv wan laif weh wortwail.

¹⁵Di laas ting Ah gwain seh, Titus, dah dis: Evrybady weh deh yah sen heluo. Tel aal di biliiva dem weh deh uova deh weh lov wi iina di fiet, seh wi sen heluo tu. Ahn Ah prie seh God gries gwain deh wid aala unu. Amen!